

Stand: 24.1.07 (überarbeitet)

Singen is gesund ©

Vör ´n paar Daag hett de „Männergesangverein Windsbraut Petkum“ sien Jahresversammeln dörföhrt. Wenn ik kann, gah ik elke Jahr – un dat siet over vertig Jahr - hen, neet blot, wiel dat vörher alltied ´n heel smakelk Grönkohleten bi Tant Dieke in hör Weertschupp „Bi Slis“ giff. Nee, wall man ok wat ut de Vereen un ´n Bült van `t Dörpleven mitkriggt un oll Frünnen treffen deit.

Un `n Kohlkönig word ok elksmaal „utkeken“. Dit Jahr meenten de 27 Grönkohleters, dat Ewald Wempen de Kroon verdeent harr. Nadem hum toe Ehren ´n paar Lieder sunge worden wassen, hett he up Stee ´n Buddel Kruiden un Doornkaat utgeven, so hett he sük freit. Is ja ok ´n heel hoog Ehr, een Jahr lang de König van so ´n hoog ansehn Vereen toe wesen.

Plattdütsk Theater in MGV

Sungen hebb ik sülvst in de Windsbruud noit, man ik de seßtiger Jahren van de lesd Jahrhunnert hebb ik för disse Vereen up Bühn stahn un Theater spölt. Och, wat wassen dat moi Tieden, as Frieda Steinmann un ik bold immer `n Leevpaar spölen dürsen un Arnold ten Hove, de dat domaals mit de berühmte Henry Vahl van de Ohnsorg-Theater driest upnehmen kunn, sien Sprökjes up de Bühn löss leet. Lang, lang is `t her.

Mit plattdütske Stücken, de immer van de Petjemer MGV-Lidd Willm ten Hove sülvst schreven un ok instudeert wurren, sünd wi in Bült Dörpen – van Ditzum bit Greet (Greetsiel) - uptreden. Un uns MGV, ruugweg 50 Mann un ok noch mehr stark, sung, bevör dat Spölen losgung, alltied ´n paar Leder. Is würrelk spietelk, dat so `n Theaterklottje al siet lang Tied in Petjem neet mehr giff, wiel man keen jung Spölers mehr dorför finnen kunn.

Wor neei Sängers herkriegen?

Siet eenige Jahren word de Tahl van de Sängers immer minner, un so lett ok de Besök up de Jahrsversammeln leep na. Dat liggt doran, dat keen jung Lü in d` Chor nakomen. Dat is neet blot in Petjem so, nee, overall klagen de Vörstande van de Gesangverenen dorover. Ok mien Fründ Roland Riese, de as Chorbaas de „Männergesangverein Emden van 1847“ vörsteiht, kann een Leed dorvan singen. Anskienend mögen jung Lü disse Aard van Singen neet. Ik finn dat leep skaa. Wo aber mehr Lü in de Gesangverenen kriegen? Dorover hemmen wi ok ditmaal up d` Versammeln proot. De Menen gungen wiet utnanner. Eenige meenten, man sullte ´n „Homepage“ in `t Internet stellen, glik mit ´n Leed, de man over d` Computer ofspölen laten kann. Dortoe hörte ik ok. Annern meenten, dat würr overhoopt nix brengen. Keen neei Sängers würr man dordör kriegen. Amenn hett Vörsitter Dietrich Schönwald, de an disse Abend as 1. Vörsitter weer wählt worden is, toeseegt, de Vereen in `t Internet unner www.petkum.de intostellen. Ok dorum, wiel man al siet Maanten ´n neei Chorbaas söcht un keen finnen kann. Thomas Kämpfer, de eerst siet twee Jahren dat Amt van Ingrid Willms overnomen harr un de de Sängers so geern muchen, treckt van Oostfreesland weg. Ik bün ok gespannt, of wat bi dat Insetten in `t Internet rutkummt. Aber beter wat maken, as all so wieder lopen laten, meen ik.

Mit Gesundheit warven

As ik van d` Versammeln toerügg komen bün, hebb ik noch maal overleggt, wo man mehr Sängers in de Gesangverenen kriegen kann. Un do is mi ´n Gedank komen, wor man mit warven kunn: Mit Gesundheit! Gesund will ja elk un een wesen un blieven. Se, leev Leser, doch seker ok? Wenn dat so is, dann lesen Se de Naricht heel besünners, de annerlesdens bi uns in `t Bladd stunn.

Well singt, word neet so licht krank. Dat hemmen Wetenskoppers van de Universität Frankfurt an Main rutfunnen. Bi hörs Unnersöken hemmen se van de Sängers un Sängerrinnen van ´n Laienchor vör un na ´n Singproov de Bloedwerte meten. Un wat is dorbi rutkomen? De för de Ofwehr van Krankheitserregers wichtige Stoffe Immunglobulin A un Cortisol kwammen na dat gemeinsam Singen in düdelk hoogere „Konzentration“ vör as vörher.

Bi ´n Kontrolltest sungen de Chorleden neet sülvst, sünnern hörten dat vörher sungen Stück as Upteken van d´ Band an. Dorbi gungen de Immunwerte neet (!) in de Höchte. Disse wetenskupper Befund over de Segen van dat Singen is seker bi de 12.000 Sängerrinnen un Sängers, de in 650 christliche Chöre in de "Christliche Sängerbund" un ok bi all aktive Leden in de 22.000 Chöre, de in de "Deutscher Sängerbund" tosamensloten sünd, mit groot Bliedskupp upnomen worden.

Villicht helpt disse lüttje Geschicht ja, dat de een of anner de Weg in ´n Chor finndt. Mi würr dat freien. Neet blot, wall ik neet mitankieken much, dat uns MGV Windsbruud, de an 17. Februar 2007 up d` Saal „Bi Slis“ in Petjem sien 85jährike Bestahn fiert, eenes Daags van de Bühn verschwunden is, wall dat keen Sängers mehr gifft. Dat was würrlek mehr as skaa, wenn weer een Stück Dörpkultur för immer verlorengahn würr.